



Bosnia and Herzegovina
Federation of Bosnia and Herzegovina

CANTON SARAJEVO
Government

Broj: 02-04-7374-2/20
Sarajevo, 11.03.2020. godine

Na osnovu člana 26. i 28. stav (2) Zakona o Vladi Kantona Sarajevo („Službene novine Kantona Sarajevo“, broj: 36/14 – Novi prečišćeni tekst i 37/14 – Ispravka), član 33. Zakona o osnovnom odgoju i obrazovanju (“Službene novine Kantona Sarajevo”, broj: 23/17, 33/17 i 30/19), a u vezi sa članom 44. Zakona o srednjem obrazovanju Kantona Sarajevo (“Službene novine Kantona Sarajevo”, broj: 23/17 i 30/19) i Naredbe Kriznog štaba Ministarstva zdravstva Kantona Sarajevo, broj: 16-20/2020, Vlada Kantona Sarajevo na **Drugoj vanrednoj** sjednici održanoj **11.03.2020.** godine, donosi

O D L U K U

o organizaciji rada u odgojno-obrazovnim ustanovama i studentskim centrima na području Kantona Sarajevo za period 11.03. do 25.03.2020. godine

Član 1.

Obustavlja se redovni nastavni proces u svim osnovnim i srednjim školama i nastavno-naučnog procesa na svim visokoškolskim ustanovama na području Kantona Sarajevo, počev od 11.03.2020. godine (srijeda) do 25.03.2020. godine (srijeda).

Redovan nastavni proces u svim osnovnim i srednjim školama i nastavno-naučni proces na svim visokoškolskim ustanovama na području Kantona Sarajevo počinje 26.03.2020. godine (četvrtak).

U osnovnim školama na području Kantona Sarajevo u kojima je organizovan produženi boravak preporučuje se da rad produženog boravka prilagode javno-zdravstvenoj prijetnji i shodno epidemiološkoj situaciji, u smislu poduzimanja preventivnih radnji u skladu sa Naredbom Kriznog stožera Federalnog Ministarstva zdravstva, broj: 01-33-1426/20 od 11.03.2020. godine.

U svim javnim i privatnim predškolskim ustanovama na području Kantona Sarajevo preporučuje se da rad prilagode javno-zdravstvenoj prijetnji i shodno epidemiološkoj situaciji, u smislu poduzimanja preventivnih radnji u skladu sa Naredbom Kriznog stožera Federalnog Ministarstva zdravstva, broj: 01-33-1426/20 od 11.03.2020. godine.

Član 2.

Ustanove iz člana 1. stav (1) ove Odluke, u skladu sa svojim mogućnostima, organizovat će "online" nastavni proces počev od 12.03.2020. godine (četvrtak), u skladu sa Instrukcijom i Uputstvom o provođenju "online" nastave koje su sastavni dio ove Odluke.

Član 3.

Obavezuju se svi studentski centri na području Kantona Sarajevo da organizuju rad u skladu sa Naredbom Kriznog štaba Ministarstva zdravstva Kantona Sarajevo, te uz uvažavanje najboljeg interesa korisnika usluga.

Član 4.

Obavezuju se ustanove iz člana 1. i 3. ove Odluke da osiguraju najviši nivo higijene svojih prostorija.

Član 5.

Svi radnici ustanova iz člana 1. i 3. ove Odluke obavezuju se da redovno dolaze na posao i izvršavaju zadatke prema uputama rukovodilaca, a u skladu sa daljnim naredbama/preporukama Kriznog štaba Ministarstva zdravstva Kantona Sarajevo, Ministarstva za obrazovanje, nauku i mlade i Vlade Kantona Sarajevo.

Član 6.

Sastavni dio ove Odluke je Naredba Kriznog štaba Ministarstva zdravstva Kantona Sarajevo.

Član 7.

Ova Odluka stupa na snagu danom donošenja, a objavit će se u "Službenim novinama Kantona Sarajevo"



Dostaviti:

1. Predsjedavajući Skupštine Kantona Sarajevo,
2. Zamjenica predsjedavajućeg Skupštine Kantona Sarajevo, gđa. Danijela Kristić,
3. Skupština Kantona Sarajevo,
4. Premijer Kantona Sarajevo,
5. Ministarstvo za obrazovanje, nauku i mlade,
6. Ministarstva Kantona Sarajevo 11x,
7. Svim osnovnim školama na području Kantona Sarajevo,
(putem Ministarstva za obrazovanje nauku i mlade),
8. Svim srednjim školama na području Kantona Sarajevo,
(putem Ministarstva za obrazovanje nauku i mlade),
9. Svim visokoškolskim ustanovama na području Kantona Sarajevo,
(putem Ministarstva za obrazovanje nauku i mlade),
10. Svim predškolskim ustanovama na području Kantona Sarajevo,
(putem Ministarstva za obrazovanje nauku i mlade),
11. Svim studentskim centrima na području Kantona Sarajevo,
(putem Ministarstva za obrazovanje nauku i mlade),
12. Za objavu u "Službenim novinama Kantona Sarajevo",
13. Evidencija,
14. A r h i v a.



web: <http://vlada.ks.gov.ba>
e-mail: vlada@vlada.ks.gov.ba
Tel: + 387(0)33 562-068, 562-070
Fax: + 387(0)33 562-211
Sarajevo, Reisa Džemaludina Čauševića 1





Bosnia and Herzegovina
Federation of Bosnia and Herzegovina

CANTON SARAJEVO
Ministry for Education, Science and Youth

Broj: 11/03-34-sl./20
Sarajevo, 11.3.2020. godine

SVIM PREDŠKOLSKIM USTANOVAMA, OSNOVNIM I SREDNJIM ŠKOLAMA I VISOKOŠKOLSKIM USTANOVAMA KANTONA SARAJEVO

Poštovani,

Obavještavamo Vas da je u skladu sa donesenom Naredbom Kriznog štaba Ministarstva zdravstva Kantona Sarajevo, Vlada Kantona Sarajevo donijela Odluku kojom se obustavlja redovan nastavni proces. Umjesto redovne nastave u osnovnim i srednjim školama, te visokoškolskim ustanovama odvijati će se online nastava, počevši **od sutra, 12.3.2020. godine, zaključno sa 25.3.2020. godine**. U svrhu realizacije ove odluke, Ministarstvo je formiralo timove za podršku održavanja online nastave prema Instrukciji o postupanju u izvođenju online nastave i Uputstvu Ministarstva od 27.1.2020. godine.

U narednim danima, počevši od sutra 12.3.2020. godine Ministarstvo će kontinuirano komunicirati sa školama te im dostavljati upute, obavještenja, instrukcije i druge neophodne informacije vezane za neometano odvijanje ovog oblika nastavnog procesa, a kojeg su se obavezni pridržavati.

Odvijanje online nastave će se tretirati kao redovna nastava, što znači da neće biti potrebe za nadoknadom časova.

Realizacije Škole skijanja, takmičenja i sve druge vannastavne aktivnosti se obustavljaju u navedenom periodu.

Shodno pomenutoj odluci Vlade rad predškolskih ustanova i produženih boravaka u osnovnim školama u kojima je organiziran, odvijat će se i u narednom periodu uz pojačane higijensko-epidemiološke mjere, a u narednim danima Krizni štab Ministarstva zdravstva Kantona Sarajevo će se očitovati o daljem radu ovih ustanova.

Svi radnici zaposleni u ustanovama na koje se odnosi pomenuta Odluka Vlade Kantona Sarajevo su obavezni da redovno dolaze na posao i izvršavaju zadatke prema uputama rukovodilaca i u skladu sa daljnim naredbama/preporukama Kriznog štaba Ministarstva zdravstva Kantona Sarajevo, Vlade Kantona Sarajevo i ovog Ministarstva.

S poštovanjem,

Prilog: Odluka Vlade Kantona Sarajevo, 02-04-7374-2/20 od 11.3.2020. godine

MINISTAR

Mr. Anis Krivić s.r.



web: <http://mon.ks.gov.ba>
e-mail: mon@mon.ks.gov.ba
Tel: + 387 (0) 33 562-128,
Fax: + 387 (0) 33 562-218
Sarajevo, Reisa Džemaludina Čauševića 1

